

1 SAMOIRI

Kamantantatsirira Samoiri

3 ¹⁹Antari ikimotanakera Samoiri yogari Tasorintsi itentakari nerotyo ikemisantavintsatantanunkanirira, ²⁰maganiroitari iseraereegi ineaigakeri inti kogakagakeri Tasorintsi impegakempara kamantantatsirira. ²¹Irirori onti itimake ivankoku Tasorintsi Suroku. Impo ario kara itsititanairo Tasorintsi iniaiganairira iseraereegi, irirotari iniake Samoiri

4 ¹impo irirori ikamantaigakeri maganiro. ...

Impogini yogaegiri iseraereegi iaigake iromanataigakemparira pirishiteoegi, ²kantankicha iriroegi yagaveaigakeri yogagarantaigakeri 4,000.

7 ³Impogini yogari Samoiri iniaigakeri maganiro iseraereegi ikantagiri: “Arisanorika opaitaka pikogaigakera pinkematsatasanoigakerira Tasorintsi atsi okaigerinityo maganiropage ipegagetaganirira tasorintsi kogapage. Pokaigakerora aikiro Asetarote. Panirosanoty pinkematsaigakerira Tasorintsi pintsatagasanoigakerora ikantagetakerira impo irirori impugamentaigakempi ganigera yagaveaigaimpi pirishiteoegi.”

Impo ario ikañogakero ovashi imutakoigakeri Tasorintsi yagapitsageigairira pirishiteoegi oga kipatsi yagutagavetakaririra.

¹⁵Impogini yogari Samoiri kantanani ijoesetakera kigonkero ikamanaira. ¹⁶Omirinkaty shiriagarini iatapiniti Vetereku ontiri Jirigareku ontiri aikiro Misepaku ikamosotapiniigirira iseraereegi. Impo iriroegi iatashiigakeri inkemisaigakerira inkamantaigakerira tatarika ikogake Tasorintsi. ¹⁷Impo yagatavagetanaira iatai Iramaaku, ariotari itimiri kara. Ariokya kara ipokashiigakeri pashini inkogakotagantaigakerira tatarika oita komutapitsaigakeri. Aikiro ario kara yovetsikakeneri Tasorintsi itagantanirira piratsi.

Ikogaigakera iseraereegi intimakera igoveenkariegite

8 ¹Impogini yagatavagetanaara Samoiri irirokya ikantaiganai itomiegi impugaigaerira impegaigaempara joese ineginteigaerira iseraereegi. ³Kantankicha iriroegi tera inkañogaempari iriri onti ishineventaigakari koriki neroty ipokashiigirira itovaire inkantaigakerira tyati kametitankitsi inti imutakovintaigake punaigakeririra. ⁴Impo yapatoitaigaka maganiro itinkamiegi iseraereegi iatashiigakerira Samoiri anta Iramaaku ⁵ikantaigakeri: “Maikari maika atake pagatavagetanaa. Yogari pitomiegi tera inkañogaempiviro, irorotari maika nokogaigake pinkogaigakenara pimpegakagakerira nogoveenkariegite kameti irironiri neginteigaenane, nokogaigaketari

nonkañoigakemparira timageigankitsirira kara imirinkaegityo timaigavagetake igoveenkariiegite.”

⁶Kantankicha ikemaigakerira Samoiri oga ikenake ikenkisureanaka iatake iniakerira Tasorintsi. ⁷Impo yogari Tasorintsi ikantiri: “Kematsaigerityo ikantaigakempirira, teranika viro inkisaige, nantitari ikisaigake, teranika inkogaige inkematsaigakenara. ⁸Kantakatari ikañoigakara ikyara nagaigaatirira Ejipitoku kigonkero maika onti yapakuapiniigakena tera inkematsaigaena irirokya ishineventaiganaka ipegagetaganirira tasorintsi kogapage. Kañotari maika teniroro inkogaige inkematsaigempira viro. ⁹Pinkematsaigerityo pinkogaigakenerira igoveenkariiegite, kantankicha oketyo pinkamantasanoigakeri tyara inkantai-gakeri impogini yoga koveenkari.”

Impo ario ikañoigakeri Samoiri ikamantageigakerira ikantaigakerira intimakerika igoveenkariiegite onti iratsipereakagaigakeri iromperaperaigakempirira, aikiro iragagarantutageigakerira yashintageigarira, kantankicha iriroegi atanatsityo ikogaigira intimakera igoveenkariiegite.

9 ¹⁵...Impogini yogari Tasorintsi ikantiri Samoiri: ¹⁶“Kamani inkañotanakempara maika poreatsiri nontiganake paniro iyashikitanakerira Veamini iripokakera viroku pisagutakerira aseite pimpegakagakerira igoveenkariiegite noiseraereegite. Iriroro pugamentaigakerine ganigera yagaveaigiri pirishiteoegi, notsarogakagaiganakaritari nokemaigakerira ikaemavaitaigakera ikenkisureavageigakara.”

¹⁷Impo antari ineavakerira Samoiri ipokapaakera iyashikitanakerira Veamini paitacharira Saoro, yogari

Tasorintsi ikantiri: “Neri yoga nokantakempirira, iriroritari pegankichane igoveenkariiegite noiseraereegite.”

Impo irirori ikaemavakeri ivankoku isekatagakarira ovashi imagake kara.

²⁶Impo okutagitetanakera tsitekyamanisano yogari Samoiri ikaemakotakeri Saoro, ontitari imagake otishitapanankoku pankotsi. Ikantiri:

—Maika atsi tinaanae, tsame nogavokitaatempira.

Irirori itinaanaka impo iaiganake.

²⁷Impo yagaiganakerora okaragetakera pankotsi ikanti Samoiri:

—Atsi kanteri ponampiria irivatana-kera, virori gatata piati nonkamantakempira tyara ikanti Tasorintsi.

Impo iivatanake ironampiria.

10 ¹Impo yogari Samoiri yagakotake aseite isagutakeri igitoku impo yasaraanatakari ikantiri:

—Onti nokañotakempi maika, vintitari ikogakagake Tasorintsi pimpegakempara igoveenkariiegite iiseraereegite.

¹⁷Impogini yogari Samoiri ikaemakagantaigakeri maganiro iseraereegi yapatoitaigakerira Misepaku kameti iokotagaigakerira tyani ikogakagake Tasorintsi impegakempara igoveenkariiegite. Impo yogaratinkakeri Saoro niganki inagakera ²⁴ikantaigiri maganiro:

—Neri yoka ikogakagakerira Tasorintsi impegakempara pigoveenkariiegite. Maika pineaigake mameri pashini kañotakemparineririra irirori.

Ogatyoro ikenaigake ishinevageiganaka maganiro ikaemavaitaiganakera:

—iNeri yogaa nogoveenkariiegite, kante inkusogamanetakera!

Impo irirori ovashi ipegaka koveenkari tovaiti ishiriagakotaka, kantankicha tera inkematsateri Tasorintsi.

*Impogini agaka kutagiteri inakera
Jirigareku itentaigakarira isoraroegite,
impo iatake Samoiri inkamosotakerira
kantankicha yogonkevetapaaka ineapaa-
keri yovetsikanake ikantavitantirira
Tasorintsi tsikyatatari itagakeneri
piratsipage.*

13 ¹³Impo ikantakeri:
—iArio pikantavagetaka viro tera
pinkematsateri Tasorintsi pintsatagakerora
ikantakempirira! Antari pinkematsatake-
rime imirinkame pegachane koveenkari
piyashikitanakerira. ¹⁴Maikari maika
teranika pinkematsateri gara okañota
maika, matakatariki kogai Tasorintsi pashini
kematsatasanotakerineririra imegakagae-
rira igoveenkariegite iiseraereegite.

¹⁵Impo yogari Samoiri ovashi iatanai. ...

**Ikantakera Tasorintsi iriroya
pegankichane koveenkari Iravi**

16 ¹Impogini yogari Tasorintsi
ikantiri Samoiri:
“Maika intagatityo pikenkisureakotari
Saoro, matakatariki nokogai pashini
nompegakagaerira igoveenkariegite
iseraereegi impugaerira. Maikari maika
pimpiaatanakera aseite piatakera
Verenku itimira Isai, irirotari nokogaka-
gake itomi imepagaempara koveenkari.”

Impo ovashi iatake.

¹⁰Impogini yogari Isai ikaemaigakeri
7 itomiegi kameti ineagakeriniri
Samoiri, paniropagekya yogiagagava-
keri. Kantankicha ikantiri Samoiri:

—Tera iriro inkogakagaige yogaegi.

¹¹¿Matsi intagani inaigi maika? ¿Matsi
mameri pashini?

Irirori ikantiri:

—Aiñokya panivani iyashiki paitacha-
rira Iravi, onti inake anta isentakerira
ovisha.

Ikantiri:

—Irovento atsi kantakaganteri
iripokakera. ...

¹²Impo ikantakagantakeri ipokapaake
ikiapaake. Inkamativagete kara kiraapo-
rogetaketyo.

Impo yogari Tasorintsi ikantiri
Samoiri: “Maika iriro pisagutake,
irirotari nokogakagake imegakempara
koveenkari.”

¹³Impo irirori yagakotanakeri aseite
isagutakerira ineakoigakeri maganirori
irirentiegi, ovashi ipokake Isure Tasorin-
tsi inagutakerira. Kantakani inagutake-
rira ovashi ikamanaira. Impo yogari
Samoiri ipiganaa iatai Iramaaku.

*Impo yogari koveenkari Saoro
ikogaketyo irogakerira Iravi, yogotake-
tari iriro pugaerine, kantankicha irirori
ishigapitsatanakarityo.*

Iravi ishigapitsatanakarira Saoro

21 ¹Impo iatake Iravi Novoku
ineakerira saserorote Aimereko.
Antari ineavakerira Aimereko paniri
yapuntaka yogavagetanaketyo kavako
ikantiri:

—¿Paniri papuntaka?

²Irirori ikanti:

—Onti itigankakenara koveenkari
Saoro ikantavakena gara tyani gotuma-
tatsi tatoita itigankavitakena. Yogari
nampirantsiegi onti nokantaigakeri
irogiaigakenara anta. ³Maika aityorika
piseka pimpakenara. Aityorika pan
penaty 5 ontirika akatirika timankitsi.

⁴Irirori ikantiri:

—Mameri, intagati timankitsi oga pan
okantavitantaganirira ogenkanira,
ontitari irashi Tasorintsi. Kantankicha
maika terika ineimaigae ponampiriaegi
tsinane iroroty nompakempi.

⁵Irirori ikanti:

—Tenirorotyo ineimaigae. ...

⁶Ovashi ipakeri oga pan inoshikairira inkaara imesaneku Tasorintsi yogaira pashini okyarira, mameritari pashini.

¹⁰Impo irirori tera irimagumatanake patiro kara, onti atanatsi iatira ishigapitsatanakarira Saoro iavagetake itimira koveenkari Akise. Irirori inti igoveenkariegite Gatekunirira.^a ¹¹Kantankicha yogaegiri inampinaegi Akise ikantaigiri:

—iEjee, pokake Iravi igoveenkariegite maganiro! iIntagarogiteni! Irirorari imatikakotunkanirira ikantakotunkanira:

‘Yogari Saoro yogamagaigakeri
1,000;
yogari Iravi yogamagaigakeri
10,000.’

¹²Iroto ikemavakera Iravi itsarogavagetanaketyo kara ipinkanakerira Akise
¹³nerotyo yamataganakatyo ipegamam-
peganakara ipigatakera ikicharinkage-
matanaketyo shitakomentontsipageku
aikiro ikarentsavagetanaketyo kara
ishimosegantanaketyo ishipatonaku.

¹⁴Yogari Akise ikantaigiri inampinaegi:

—Onti ipigatake. ¿Antari gara pitentaigari aka naroku? ¹⁵¿Matsi tyara nonkantakerira naro piganto? Tigankai-gaerityo parikoti.

22 ¹Impogini ishiganaa iatakera imperitanakiku paitacharira Arorame ovashi itimakera kara.

Ikamakera Saoro

31 ¹Impogini yogaegiri pirishiteoegi yomanataigakeri iseraereegi yagaveaigakerira yogishigai-gakerira otishiku paitacharira Jirevoa, ario kara yogagarantaigakeri tovaini.
²Ipatimaiganakeri Saoro intiegiri itomiegi yogaigavakeri Jonatan intiri Avinarave intiri aikiro Marikisoa, iroegitari itomiegi Saoro. ³Impo irokya yapatoventaiganaka Saoro ikentaigakerira ichakopiteku ovashi itsarogavagetanake ⁴... yagamatanaketyo isavurite imokoroakara, ⁶nerotyo ikamantakarira itentagaigakarira mavani itomiegi intiri pagotininirira yomanatantarira intiegiri aikiro maganiro inampinaegi.

a 21.10 Gatekunirira: ogari Gate onti apatogetakara pankotsi nankitsirira Pirishiteaku. Yogaegiri timageigankitsirira kara ikantagani pirishiteoegi.